

Rolltreppe

Der Erfinder der Zeitmaschine telefoniert mit seinem ersten Kunden.

Sprechnummer zum Thema Zeit

aus dem Programm «Zit isch do.com» 2001

Basler Mundart

©Aernschd Born 2001
Verbreitung mit Genehmigung des Autors

Bisch es Du? – schön, dass persönlich abnimmsch - ha numme welle sage - dass mi Erfindig, die isch jetz... d.h. i ha jetz alles duurecheggd - si funggtioniert - dr Prototyp lauft super und jetz wurdi natürlig gärn in d Produktion go.

Wie gsäit, es handelt sich um e Schtäge, wo de Lüt entgäge kunnt s isch so quasi e entgägekommendi Schtäge - si kunnt dir Schtuefe für Schtuefe für Schtuefe für Schtuefe entgäge – schtuefelos dr Mensch mues numme no s Bäi lüpfe - und dr nöggtschti Schtägetritt schiebt sich automatisch drunter denn lüpft dr Mensch s zwäite Bäi und die nöggtschti Schtuefe schiebt sich drunter, - denn s dritte Bäi und wider e Schtuefe s vierte Bäi und... - was?

Ah jo klar, Du hesch em Mensch numme zwäi Bäi gä – aber er het drfür unzähligi Schritt - und ich gib em siibe Tritt – Schtägetritt natürlig – aber noch siibe Tritt isch dä Mensch ebbe noni doobe - es tritt ihm jo e jede Tritt entgäge - so vo obe abe und wenn e Tritt unde aakoo isch, wird er vom Ärdbode verschluggt, d.h. er tritt ab sozusage und noch däm Abtritt wird er unterirdisch und unsichtbar undenuffezoooge, obe wider ummeglizt und scho tritt er obe widr uff und fliesst so als neu Schtuefe obe abe und em Undenuffeschträber entgäge.

Jäwoll – oobenaabe - logisch wän d Mensche unde uff – d Uffschtiger sin gfrogt - will obe bisch du und unde bin ich obe isch guet und unde isch bös - obe isch s Hirni und unde isch Pfui - Wär will scho in d Höll?

Und so halte mini entgägekommende Schtuefe dini Mensche s läbelang uf Trab.

Und wenn si wänn obe aakoo, müen si äifach schnäller schtige, als d Schtäge obenaberollt. S komme immer widr die gliche Schtuefe, aber dr Mensch merggd das nit, är mäint, är sei mit jedem Schritt uff ere höhere Schtuefe und e Bitz nöcher bi Dir. Und kuum schnufft er us, kuum macht e Päuseli, scho rollt er widr zue mer abe. Denn sehsch en widr seggle und villicht landeter bi dir obe im 7. Schtogg. S Geniale isch übrigens: Ich ka d Gschwindigkeit verschtele.

Wenn z viel Mensche bi dir obe im Himmel hesch, dräh i äifach dr Speed e weneli uff, dSchtuefe komme schnäller obenabe, und scho han i widr e paar uspumpi Mensche meh bi mir in dr Höll. Jäjoo, die Himmelsläitere lauft wie gschmiert. - Göttlig. Gäll.

Wieso teuflisch? Dasch doch käi Rolltrappe.

Das isch e absolut erschtmoligi Erfindig, das isch e Zitmaschine.

Wie si häisst, wäiss i nonig. I ha do diversi Vorschläg: Schtressschleudere, Edenkiller, Zitbombe, kasch wähle – aha du bruuchsch Zit zum überlege, hejo, kasch ha soviel d wottsch.

Jetz isch fertig mit dr Ewigkäit – jetz hämmer Zit.

www.borninbasel.ch